

Paoro

Timoteo

Pukeri Iyoteparia

Paoro Timoteowichio iyotepawa

1 Kúíraa Timoteo. Nee Paoro Riosie e'rariaeo, Riosie Weratiamee weratiamea, i'ka iyojura aamo uhjurenania. Pu'ka Eesusi Riosie Weratiame enamio puuyeka mochitoame teemea, puuu iintomichiopua taamo ki'yakao, itapiti Riosie taamo kiapo tuutiameo. ²Neeea aamo Timoteo Riosichi no'o taanachitia tetewao, Apoe taamo Noono tewekachi kahtiamero, Apoe Eesusi Riosie Weratiameopua tiameo, aamo ta'iria yasira kiajeraninia pu'kao aamo iikachio, te'ta kaawerumari amochi teeréwari.

Paoroe inatenura ki pichiwaka masitiamechi

³Neeea aamo Timoteo, Maseronia simiyaionia, wa'a Eejasio aamo itipinurakamenia, ki ka'karuma ma'masitariopua terimíchio, pu'kao kiisi pichiwaka masitiamekopa wa'ao. ⁴Pu'kao teripuapua, kiisi masitenuraka ihtaoi ehkoriaami ki pichiwarichi simiyame naawesario, ki mehkasi mehtanamichiopua pu'kao, oowera pu'serepuawichio nayewaniameo. Ka'te tehpe wekatenuremitiapua tiameo, ehkoriaami o'inia ahpo tijoetusiriachi nayewaniame nayewakao, puuu pu'kakamera aamo nane'rejerekao, sewinatamepua te'ta nateyamera Riosichi simiyameo. Puuu wa'a tiamea, itapiti nekakoniamече mehtachamepua, kihta taamo ku'yame Riosichi taamo paparamiaopua, taamo Riosi nakiyachitiaopua.

⁵I'ka no'o aamo terinuriaa wa'a Eejasio mochikameo, aamoo neea, te'ta Riosichi e'enaniame aamo masitenuramichio cheekamenia, pu'ka Riosichi e'enaniame pu'sereka keepukekameo, kaawe e'raka Riosichi e'enamichiopua. Wa'a tiiao Riosi nakirewa uukamea, pu'ka nakirewae wa'achitia ahpo kaawe nakika

mochitomichiopua, te'ta pichiwa Riosie ahpo piipatetiameko erakoka, te'ta ahpo Noono tewekachi kahtiamechi paparakamekapa. ⁶Ookapi wa'a mochikame ma'masitaria, kihta pichiware te'teriamepua Riosichi simiyame ahpo masitiao, tisiwa se'wi wewekakamepua, Riosikamera te'ta ahpo nokijeratowaopua. ⁷Puuua Riosi nuurarichi simiyame masitari enenariamepua enenariaa, nape oowera ahpo pichiwariko erakoa, maaewache masitiamepua, kiisi nane'riamepua Riosi pichiwarirachi simiyameo, te'ta Riosi pichiware masitio tuuyai.


⁸Riosi nuurari ehkoriami Moise kiaretiaa kaawerumapua kaawerumao, nape ki aampachi pehji epeche nuurarieme yahchetiamea taamo Noono tewekachi kahtiameche yahcharia, nuurarira na'naritoniamemeche enesaa. ⁹Ihtaoi yoorewa nuuraria, ki aaata ka'karuma nokayamerawichio kokosapuawichio yachatiamepua, ki ka'karuma nokayamechewichio yachatiamepua. Wa'achitia Riosi nuurari yahchariai, ki Riosi nuurari yooreka mochitoakamera, kokosamichio yachatiamepua, i'ka noonoikamechitia: tewekachi taamo Noono ki iyorikamechitia; aaataoi tewekachi taamo Noonochi paparamao kiisi yooreka tetewikamechitia; ti'tijoeri ko'yamechitia; aaata ahkasi ahpo yayawaoi ko'yamechitia; ¹⁰yooma aaata suwepori nokayamechitia, ti'tijoe ooweruchitia ahpo uuyamechitia, ooweru ti'tijoechitia ahpo uuyamechitia; aaata ti'tijoeri ichikoka chapisa toomichi nehjame; wistuka mochitoniameme pu'serewa tiamechitia; kihta iintokoi wenejiamechitia; wistuki te'ta ahpo pichiwarichitia tuuyamechitia. Yooma ihta wa'a tiame nokiamea, ki Riosi nuurarikamera e'weniamepua, ihtaoi kaawerumachi simiyame masitewachio. ¹¹Ihji kaaweruma no'o masitaa, Riosi kaaweruma masiterachi o'inia eenamepua, Riosi kaaweruma tuuyewari no'o ki'yaria, yomatiameme ti'tijoerichi no'o masitemichiopua. Ihji te'ta tisia nateyame tuuyewaria, Riosi kokosarichi simiyame newipapuaamepua.

Paoro cheriwema ki'ya, Riosie ahpo tesiwetiamewichio

¹²Neeea Riosie Weratiame no'o Paamirao, tisia kaawe e'raka cheriwema ki'yamenia pu'kao, no'oo ki no'okamera werame tiioio, no'oo oowe e'reka weerariopua pu'kao, apochi simiyame no'o nayewatumichioopua. ¹³Riosia wa'a iintoriopua noochio, no'oo pukerio kiisi kaaweruma inatakamekoipua Riosie Weratiamechio, tisia a'chikoi chaanekamekoipua ki kaawerumao, no'oo Eesusichi paparamao tisia na'ara yoorakamekoipua ko'inareka naanarikáo, wa'a no'o iintokamepua. Riosia tisia kaaweruma iintokamepua noochio, tisia no'o cheriwekaopua no'o pukerio kiisi kaawe no'o iintoriao, no'oo pukerio ki nane'riapa, wa'a iintokamekopua, Eesusi Riosi Taanarao aatanakoopua. ¹⁴Pukaepa neeea, ki nu'uti noochi kaawe iintowa tetewamenia, i'ka tehki apochi simiyame

kaaweruma nayewamichio no'o weerariopua, yomatiamie ti'tijoeri Eesusichi paparamichiopua, te'ta Riosi Taanarakamera nakika mochitomichiopua, Eesusi tewaniameopua.

¹⁵Eesusi Riosie Weratiamea, te'ta tatakorikame newipatemiawichio naawariaa, te'ta tísia pichiwa puuua, pu'kawichio naawakameo, yomatiamie teeme ti'tijoeri, te'ta pichikemetepua pu'kao, ti'tijoea, ooweru tiame. Yoomahka Eesusie newipatetiamea, neepua te'ta tísia tatakoririo e'ramea. ¹⁶Nape Riosia tísia no'o na'ara ihsioio pukerio, wa'a no'o teewetorepua ahkasi ahpo Taana Eesusichi no'o paparasichi, ki nu'uti no'o tatakoririao, ki nu'uti cheriweniamie tetewitenariapua noochio, pu'ka wa'atiame noochi tetewikameo, ki nu'uti tatakoritiamioiopua, cheriweniamekopua Riosieo, wa'a



Paoroa Timoteo yoranura tuuyena. (1:18)

iintosaapua, ki wahjiamesi ahjari kiamiapa. ¹⁷Pukaepa wa'a iintoriopa Riosio, ahpo Taana Eesusieo, ki nu'uti te'ta iyoriwa teewemete teemea, Te'ta Yawichi ki wahjiamesi yasitoamekopua pu'kao, apoechekopua ki wahjiamesi ahjamekopua Riosio, apoe kai Riosikai tiioapa pu'kao, ki pusie tetewiniame, kiisi teteipua tiamekopapua, puuu Apoechepua, te'ta peenewari tiameraa. Wa'a teeresa naaju.

¹⁸Pukaepa neea aamo Timoteo no'o taanachitia tetewao, i'ka aamo chaaniamenia: Utewaeme aamo teetomitiamua Riosi tehkiwachio, te'ta ahjachi erasika Riosichio, Riosi Riosiwari amochi chiiie e'wekache teetoka, te'ta aamoo nuureretiachitia, i'ka tehki yoramichio weratioio. ¹⁹Aaata ki apochi teetokamea Riosi Riosiwari chiiiao, ahpo na'ituamepua, Riosichi ahpo kaawe te'teriao, ipakame puuua ahpo Riosichi paparario. ²⁰Ihji Iimeneo tewaniamea, Arejanto tewaniamea tiamea, wa'a noonoika ipakamepua ahpo Riosichi paparario. Wa'a noonoikopania pu'kao, Satanasi aiwarichi toakamenia, wa'a ahpo inatapamichiopua Riosi na'areriao, wa'a inatapasaopua, Riosichikamera eenepamichiopua eenechio.

Aachin teeka nayewapuame Riosichi paparaka

2 Neea aamo Timoteo, i'ka aamo chaanejeramenia wa'a Eejasio mochikameo, Riosichi iyorimia nanapawiamieopua, pu'kaonia Riosichi ku'iwa itanejeraninia, yomatiamie weeechi mochikame ti'tijoeriwichioo, Riosichi e'enamichiopua paparamiao. Pu'ka wa'a Eejasio nanapawiamieopua tiameo, aamoo chaanenuriamenia pu'kao,

aaataoi ahkaoi Riosichi paparakameo, Riosichi ku'iwa itanemichiopua pu'kaoi, ihtaai ahpo tesiwa te'teria nakiweka mochitoao, iinuemichiopua. Ka'te natekepanuremitiapua pu'kaioi, ahpo cheriwema kiamiaopua Riosio, itapiti ahpo tesiweretiawichiopua. ²Wa'achitia yooma ya'yawichiwichiooi, kaaweruma yawichituniame itanenurapuapua Riosichio, ahkaoi yawichitutere mochitoameo, ta'iria mochitomichiopua pu'kao, kihta eeyowa erakoka. Wa'a te'tereka mochitosaapua, ta'iria yooreka mochitomapua Riosio, wa'achitia ahpo wa'apioi puuuu, kaawe erakoka ahpo yooreka mochitomapua. ³Wa'a tiame Riosichi itayamea, kaawe e'reka tetewipuamepua tewekachi kahtiamie Riosieo, Apoe te'ta taamo Newipatiameo. ⁴Puuu Riosi Apoe Newipatiameraa, yooma aaataoi ahpo pichiware tuuyewari pichikekameo, yoomahka apochi e'enaka newipajeramepua. ⁵Yomatiamie te'ta utewari Noonoraa, piiripi wa'apiche puuuu. Aaata pukachi kaawe taamo teerepatiamelai, piiripiche puuuai, puuuu, Riosi tiari i'ka wehjoarichi eenaka tijoetukamepua, Apoe te'ta Eesusi Riosie Weratiamie. ⁶Puuu Eesusia, taamo pejana ahpo ahjari mukiwachi nehjakamepua, kurusichi mukuka taamo tatakoria wikiria natetekao. Wa'a iintokame Eesusia, te'ta Riosi yahcharia taawechi iintopuawichioo. ⁷Nee Paoroa Apoe Eesusi wa'apie weratiamiepua, apoe wa'apie iintoria pichiwataka tuuyepamichiopua, yomachiami oika, ki i'isaeri ti'tijoerichio. Ihji no'o tuuyesika oiyaa, te'ta pichiware puuuu, kiisi wihtuki.

⁸Eeme ehpe taawechiami Riosichi paparamea, kaawe erakoka ahpo nayewejerania, kihta siinto weeru chaachapaka ahpo nayeweka, kihta nekakome chaachapaniame. Ohso kaawe eemea Riosichi te'teriamiechitia te'terepuapua, itapiti ki kaawe tiame amochi teeresoo, Riosichi itapuapua ku'iwao, kaawe teerepamichiopua amochio. ⁹Eeme ooweru Riosichi paparamea, ehpe taawechiamio pehjo, Riosichi te'teriamiechitia sipichatajeriamenia, ki siintoka peeniatatiame, ki aaatae ikotupua teerepuawichiopua; itapiti o'roe netetiame tisia nateyameo, ki siintoka chuchatuapua pu'kao, aamo peeniataniachitiao; aamo kuupaai ki siintoka peeniatatiame itichitiamie tetewiteréjaninia. ¹⁰Ohso kaawe eeme oowerua, aamo Riosiwawichio peenia te'terewaa, aamo ka'karuma nokiwakamera puuuu, aamo wahjachi tetewachio; wa'a te'teremete oowerua, te'ta Riosichikamera te'te iyorika mochitoamea. ¹¹Eeme oowerua tiameo, tiopachi Riosichi simiyame masitioi tijoeo, ihchi mochika kaawe keepupuapua pu'kao, te'ta iyorika Riosichi simiyame aamo keepuao. ¹²Nee ooweruo ehpe taawechimio tiameo, ki masitemeriko e'ramenia tiopachio, ti'tijoechoi ki aaata paamiratuame enejeramenia, tjoekamera ahpo paamiratuamechitia tetewijeramenia. ¹³Wa'a

tiiame e'ramenia ooweruchio, Riosio, tijoekamera neteriopa pahchao, Aarani tewaniame, ki oowitiamekamera pahcha, Eewa tewaniame. ¹⁴Aarania tiameo, ki puuukamera wihkuetiamepua Satanasio, Eewakamerapua Satanasio wihkuetiamepua, wa'a iika tatakoriamepua pukeri o'iniachio, naayachio. ¹⁵Nape pahcha netetiame ootiiame tísia tatakoriamekaipua Riosichio, yooma oowitiamé Eewa tewaniame Riosi neteriachisi wa'anao, Riosie cheriwepuamepua tatakoriario, kokosapuamechi newipatekao, Riosi Taanarachi paparasoo, oowitiaméchi naawakameo. Puuu oowitiamé Riosi Taanarachi paparamea, eee tiiame enepamapua: kaawerumachi ihsiwa inatame; ki siintoka ahpo tísia peeniatapua e'rame.

Riosichi paparame pa'pamiratuame, aachin te'teretomeri

3 Aaata Riosichi paparame paamiratuame enenariamea, tísia kaawe wa'a tiiame inataniamea. ²Nape puuu a'kache tísia kaawe teeremerichio: Kihta ahpo teripua teerewaame; ahpo uupiche ahjama ohjoeka yasitomeripua; kaaweruma teetoameche enemeripua tijoe; tísia kaawe inatasa iintoame; ki a'chikoi ihsiame ki inataniameo; kaawerumache nayewaniame aataaoi; ahpo ta'pechi enapameoiopua, kaawe uuka tetewame; masiteniamechio, kaawe peeneka masitiame enemeripua; ³ki nawajiamé enemeripua; tesiwe e'reka tetewame enemeripua aataaoi, ki e'raka ihsiwa yoorame; sosopatiame ihsiwaame eneméripua, aatachio; ki nasiwame enemeripua, naawesarichio; toomichio, ki weemuame enemeripua. ⁴Aaata Riosichi paparame paamiratuamea, ahpo ta'pechio, kaaweruma yooretewa masitiame enemeripua ahpo tatanao; ⁵puuu ki peeneka yooretewatiameopua ahpo ta'pechio, ka'chi iika paamiratumeripua, ka'chi iika neesetomerikapa Riosichi paparameo. ⁶Puuu paamiratumeria, ki pukeri weemera Riosichi paparakame enemeripua puuu, weemera paparakamea, riaorósi wichichairachi wichitepuamekoi puuu, riaorósi pu'kao, weruma ahpo erakotemakoipua. ⁷Puuu tiameo, kaawe teteiwame enemeripua ki Riosichi paparameopua, kihta ki kaawe tiiame ahpo nayewapuawichio. Ki kaawe teeretoame enesooopua ki Riosichi paparameo, riaorósi ti'tijoe, na'ara chaanetemapua pu'ka paamiratuameo.

Tiopachi neesetoka ti'tijoe ku'kuyameopua, ooweru ku'kuyameopua tiame, aachin teeretopuame

⁸Tiopachi ku'kuyame ti'tijoe ooweruopua tiameo, kihta ahpo teripua tiiame enemeripua puuu; piiripi tiiame cheesaa, ki eenechi sewina cheesiamé enemeripua; nawajikaoi ki pu'seriamé enemeripua;

toomichioi ki tahpitika siinto e'rame enemeripua. ⁹Puuua yooma pu'ka Riosie Weratiamechi simiyameo, te'ta pichikiame enemeripua, pu'kao taamoo, te'ta nateyamechitia taamo neesetoa. Kihta itapiti a'chitiame apochi noriwi tiame inatame enemeripua; puuua, itapiti ki ahpo Riosichi tuuka katewiaopua pehjo, ahpo katewename enemeripua; ahpo inatarichio, itapiti ki kaawe ahpo iintoriopua aaatachio, ahpo katewename enemeripua Riosichio. ¹⁰Ke'chu weraniaiopua, aatiatatiame enemeripua; ti'tijoeo, kaawe tiame tetewiniame enemeripua. Yooma ahpo aatiatawachio, kihta ki kaaweruma tiame machenakame enesoo, oowe e'reka werapuamepua pu'kao. ¹¹Ooweruai tiopachi ku'kuyameai, wa'achitia yooreka tetewipuame enemeripuuai; kaawe inataka ihsiamie ihtaai ahpo yoorao aaatawichio; ki tísia na'arari naawesarieme enemeripua; yoorakache itipiame ahpo iintomo tuuriao; oowe e'repua tiame enemeripua apochio. ¹²Puuu ti'tijoe tiopachi ku'kuyameai, ahpoche uupiche ahjama mochitoame enemeripuuai; ahpo ta'pechio, kaaweruma yooretewa masitiame enemeripua ahpo tatanao, ki ahpo tatanaopua tiamé. ¹³Puuu ku'kuyame wa'a te'teriami ahpoo ta'pechio, puuukamera kaawe neesetoame enemeripua tiopachio. Pu'kao wahjachia, te'ta ka'kaweruma te'teriami tetewapa pu'kao wa'a tiopachio, puuua tísia oowe e'remapua pu'ka wa'a tiopachi ku'kuyameo, puuua wa'a iikao epeche ahjachi erapamapua, Riosie Weratiamechi ahpo paparao, Eesusi tewaniamechio.

Taamo Eesusichi paparawa pichiwari

¹⁴Ku'we wa'a enamo o'rane aamo kahtiachi, nape ke'chu wa'a no'o eenoio, i'ka tuuyewari aamo uhjuremo erapakane pahchao. ¹⁵Ihji aamo no'o uhjuriaa, aachin teeka aamo mochitojerapua wa'a tiopachio, seenekachi no'o tehpe enepamio e'rapa. Eeme Riosichi paparama wa'a tiopachi nanapawiamea, Riosi tioparachi ki pusie teteiwamechi te'teriami epua, pu'ka tiopa ki pusie teteiwame tewekachio, Apoe Riosi wa'a kahtiamepua neesetokao, ahpo te'ta pichiwarie nehpuapakao. ¹⁶Ihji Riosi pichiwarira taamo pichikeka mochitoaa, ki nu'uti tísia te'ta kaawe tiame iintatiamepua, taamo Noono tewekachi kahtiameeopua. Puuu tísia pichiwari taamo pichikeka mochitoaa, ihjipua:

Apoe taamo Noonoo,
 apoe tijoetuka tamochi eenakamepua;
 puuu Riosi Riosiwairaa tamochio,
 te'ta tísia Kaawerumako taamo tuuyamepua Riosio;
 Apoe Riosi Tijoetumioio,
 ki ookapi Riosi tewekachi ku'iwarie tetewitiamepua,

aapoe chaachapakamepua akana naawario Eesusio
kohjakoio.

Yomatiamе wehjoarichi ahjachi pichiketiamеpua,
Apoe wa'api Riosichi simiyame aachin tiameko apochio Eesusi
nayewatuka oirioio;
Puuua weeechi oisoopua,
ahpo te'ta Noonoe apechunatiamepua tewekachio,
ahpo Noonо te'ta Riosi kahtiachiopua.

Eesusichi ahpo papara toimeri wahka ihtoriachio

4 Riosi Riosiwaria ma'chiamе no'o tetewitiamepua, i'ka wee
kajuyachi teetowachi ikimeriopua, muuwaeme ti'tijoeri
Riosichi ahpo paparao, toaka mochtomerikopua. Puuu ti'tijoea
oowerua tiame, ohsokamera Satanasi na'arari ti'tijoeturichikamera
uumpamapua, tisiwa wihtuka masitiamerakachi. ²Puuu ahpo
Riosichi paparawa toakamea, wihkuame ma'masitarikamera
na'naritomapua, ma'masitari kiisi suuwe erapamechi wistuki
masitiai, puuu ma'masitaria ahpo inatarichio na'ie tajaka
choochokamekatepua, puuu inatarichio wewekakamekapao. Puuua,
pichiwaka chaachapameka nayewamepua Riosichi simiyameo,
nape kiisi pahiaioipua ahpo inatarichio. ³Puuu ti'tijoeri wistuki
masitiamea, nenewiwao kiisi kaawe tiameko chaachapamepua, nape
Riosia ki wa'a chiiamepua. Puuu wa'a chaachapamea tiameo, ihta
kooameoi taamo wa'inamepua ko'kopuawichioo iyoripua tuukao.
Nape teeme Riosi chiia machiyamea, nane'riame teemea kihta
iyoripuamekopua ihta kooamekoio, yooma kooameo Riosi apoe
iintoriopua taamo ki'yakao, yooma kaaweruma kooame, yooma
ihta kooame pukeri naayachi enepatiaio. Pukaepa teemea, ihta
kooame Riosie kiatiamеo, kihta iyorika koayamepua, cheriwema
kiasache Riosio, kaawe ko'kopuamepua. ⁴Riosia yooma ihta ahpo
enepateriaio, kaawe tiameko tetewikamepua. Pukaepa Riosi iintoria
kooame taamo ko'komiawichioo, kaaweruma puuua, aataai ki ahpo
wa'inametepua ko'kopuao. Pukaepa Riosi taamo ki'yaria kooameo,
ta'iria ko'kometepua pu'kao, cheriwema ki'yakache Riosio. ⁵Riosi
cheriwema kiasaa teeme, ihta kooame ko'komiaio, Riosi apoe
kaawerutamepua aamo ko'komiao.

Paoro Timoteo kaawe tuuyewa, Riosie Weratiame tehkiwachi kaawe teetowa

⁶Yooma wa'a tiame aamo masitesoo wa'a tiopachi Riosichi
paparameo, kaaweruma ihsiamе enemamua Eesusi Riosie
Weratiamewichioo. Muuua tiameo piiреchi masiteka ihsiaio, aamo
wa'api penitamamua, aamo Riosie Weratiamechi paparariachitia,

aaatae aamo masitetiaio Eesusi Riosie Weratiamechi simiyameo. ⁷Nape Riosie Weratiamechi simiyame masitiaio, ka'te na'roemitiapua kihta nateyame ehkoriaami nayewaniame pu'serewaeo; ohso kaawe muuuu, te'ta aamo Riosichi kaawe teeretoniamemeche, pewatiame teetopuachepua masitekao. Muuuu tiameo, te'ta aamo Riosichi simiyame penipawa i'yasiupapua. ⁸Taamo weerewa w'l'rochaniamea, kaawe wichiyamepua weerewawichioo, nape Riosichi epeche kaawe teerepuawichio i'yasiamea, pu'ka aataawichio epeche nateyamepua, ki ehpechewichio natemerikapa, ahkasi wahka ihtoriachisi natemerikapapua, te'ta Riosi taamo ahjama mochikoioipua. ⁹Yooma ihjia tuuyewari no'o aamo chaaniaa, te'ta pichiware puuuu, i'kao yomatiameme ti'tijoeri pichikémetepua, ti'tijoe ooweru tiame wa'áchtia. ¹⁰Pu'kakamera Eesusi pichiwarirakachi simiyame, pichikémichioipua taamo keepuameo, utewaeme tekipanakame teemea, tísia taamo na'ara chaanewa aiwatoriaopua. Wa'a te'teretoame teemea masitekao, taamo tatakoriaa newipatewa oowe e'riapa, pu'ka Riosi Ahjamechiopua, puu Riosi ahjamea yooma newipatiamepua, nape ahpo Taana Eesusichi paparakameo.

¹¹Muuu Timoteoa, yooma i'ka aamo no'o masitenuriao, yooma wa'a tiame masitemitiamua aamo masitiaio, kaawe pepenipanurekapua pu'kao, ahkaoi aamo oiyachiamio. ¹²Aamoo temarikapa a'chi chaaneniaio, ka'te a'chi eramitiamua; ohso kaawe muuuu, aamo Riosichiche kaawe teetoame enepuapua, pu'ka aamo kaawe teetowao amochi tetewiteka, aamo wahjachi Riosichi poponiwao pipiniwaopua tiame, aamo ihsiwa na'naritoka wa'achi nokisimichioipua, yoomá i'káchtia: kaawe e'reka nayeweniame; kaaweruma ihsiwa teereniame; kaawe e'raka yorakeniame aataawichioo; te'ta paparawa tetewitewa Riosichio; ti'tijoe ooweruchio, yooreka ahpo tetewitewa, kihta suwepori ahpo nokiwa; ooweruai ti'tijoechio, yooreka ahpo tetewitewa, ihtaoi suwepori ki kaawe nokiwá. ¹³Nape ke'chu ki wa'a no'o simioio pehjio, iiweta simitepuapua iyonakao, Riosi Iyotaperichi chiia, yooma inamuachi wa'a tiopachio, pu'ka chiia masiteka. Pu'kao kaawe tuuyepuapua kiisi nahsinepaka teetowaopua Riosi chiiá. ¹⁴Muuu Timoteoa, ka'te natakepamitiamua amochi seekarepaka weraretiaio, wa'a tiopachi pa'pamiratuameeo, Riosi Riosiwarié erapateretia aamo werapuawichioo. Muuuu paikapieoi Riosi ye'kari aamo kiatiamemo, ku'ika yasitopuapua wa'a Eejesio tiopachi mochikameo, ihtaoi ku'iwa yorakekaopua pu'kao, ihtaoi Riosichi simiyame kaawe masitekaopua pu'kao.

¹⁵Kaawe teeremio iintasa inisipuapua aamo tehkiwa, kaaweruma epechetoame tetewipuawichioipua amochio, aamo paamiratuachi yoorapua. ¹⁶Kaawe aamo neesetomitiapua pewatiame yasitoka, wa'a

tiopachi aamo masiteka ihsiachiopua. Wa'a teetosamua Timoteoa, wa'achitia Riosie aamo tatakoriria cheriweka newipateretiachitia, wa'a tiiao ki ookapi aamo keepunariamea tiame, Riosie newipatemapua pu'kao, ahpo Taana Eesusichi paparasoo.

Paoro tuuyerewa Timoteoo, Riosichi paparamechi simiyameo

5 Nee Paoroa aamo Timoteoo, aamo chaanania, yooreka aamo tuuyenurenania o'ochetiameo, kihta te'ya cheeka, kaawe e'reka tuuyepuapua ohso kaawe, aamo noono itapiti nane'remichio tuuyamechitia. ²Ooweru pa'pamiraopua, aamo yeeye yooreka nayewiamechitia, tuuyepuapua pu'kao. Ooweru kuteweopua pehjo, aamo pipinichitia yooreka tuuyepuapua pu'kao, kihta ahjama kochiwa erakoka.



*Aaata ooka ti'tijoe kunamukukame
ihkokena. (5:3)*

Riosichi paparame enesaa, Riosichiche paparaka yasitoamepua ahpo ku'ipua, senepi taaweche Riosichi paparaka itaka, ihtaoi itapiti ahpo nakiwiao. ⁶Nape aaata kunamukukame ki Riosichi paparaka yasitoamea, oowera ahpochewichio ta'irewa yooraka yasitoamepua. Puuu kunamukukamea, mukukamekatepua Riosiwichioo, ahjaka yasitoamekai. ⁷I'ka aamo kaaweruma teerenurewa, masitepuapua tiame wa'a tiopachi mochikameo, kihta ki kaawe ihsio tuupuaichiopua, aataaeoi. ⁸Aaata ka'chi erakoamea ahpo tetejima tisia tesiwa te'tereka mochikoio, ihtaoi itapiti nakiwekao, ahpo ta'pechioi epeche te'ta tesiwa teewenioio kiisi ku'yamea, kiisi Riosichi teerepuame inataka yasitoamepua; wa'a tiamea, ohso kiisi kaawe tiamepua Riosichio, ki aaatachitia ki Riosichi paparamechitiao.

³Aaata ooweru ahpo kuuna mukipatekameopua, kaawe e'raka ku'ipuapua pu'kao, itapitichi tisia tesiwa teeresoopua pu'kao. ⁴Nape tatanaesoopua ahpo ku'ime te'terame, pu'ka tatanarao, kaawe ku'inurepuapua ahpo yeeyeo. Iinuesoopua susuwarao, kakawarao tiameo, kaawe ku'inurepuapua pu'kaohi ahpo su'suo ahpo ka'kaohi. Riosia wa'a te'tereka mochitoniamoo, tisia kaawe e'reka tetewamepua, neeeai wa'achi e'raka tetewamepua.

⁵Aaata kunamukukamea, te'ta

⁹Puuu ooweru kunamukukamea, ahpo ku'ipua teerepuawichioo tiopachi mochitoameeo, eee tiame enemetepua: paika weerewa oosa mariki u'matoame paamuame; piiripi wa'api kuunaeka yasitokame, ahpo kuuna ahjaka yasitioipua. ¹⁰Puuua tiameo, ahpo yooraka yasitoriao, ka'karuma yooraka yasitokame, tetewitiame enemeripua; ahpo tatanaopua tiameo, ka'karumache tuuyewa tuuyeka yasitokame; ahpo ta'pechi asikoameoiopua, kaawe uuka asipukame; aaata Riosichi paparameo, ki weruma ahpo uuka yorakekame enemeripua; aaata itapiti aiwaka mochitoameo, ku'ikache yasitokame enemeripua; ihta itapitioi, kaaweruma ihsika yasitokame.

¹¹Puuu ooweruo ki ahsepame paamuameopua paika weerewa oosa mariki paaumpario, ki iyopupuapua pu'kao ku'iwa kiapuawichoo, seenekachioi neewinaremerikopua pehjo. ¹²Neewisaapua, ka'chi iika tekipanamaoipua tiopachio, ahpo yooraka yasitomia chaachapatiamoopua. ¹³Puuua tiameo ku'iwa kiatioopua, nanasiname enepamaoipua, oowera wa'ami ahka ohjonaremapua ta'pechiamikoio, ki ka'karuma i'topakaopua naawesari, itapiti naawesaniachioipua peyachi papakika, itapiti kichiweme tiame chanika, pu'ka wa'a tiameche nokaka mochitomopua, kihta yooraka wekateka. ¹⁴Pukaepania pu'kao, nenewijerania ohso kaawe, tatanatasaopua moena yasimichioipua, ahpo tatanakamera inateka. Pu'ka wa'a teeka yasitooopua pu'kao, Na'arari Noonoraa, ka'chi iika aaata na'aretemapua pu'kao. ¹⁵Nape ookapi ooweru kunamukukame ki te'ta paamuame ki nenewikameopua, seewiamenia pu'kao, se'wikamekopua Riosi kaaweruma poerachio, Satanasikamera ahpo eratiakamera nokisikamepua, ahkaoi ta'pechiami ta'ratoka, kiisi kaawe te'tereniame nokisika.

¹⁶Aaata Riosichi paparame kunamukukame tetejimaeme enesaa, pu'ka tetejimarao, ku'inurepuapua pu'kao, kihta pehtiameteeremichioipua tiopachi mochikamewichioo, pu'ka kunamukukame ku'ipua. Pu'ka ahpo tejima kunamukukame ku'ika yasitooopua, yooma tiopachi ku'iwaa, ahsepamapua waikao, tiopachi kunamukukame mochikame ku'iwaa, te'ta tesiwa te'tiamerawichioo.

¹⁷Ehpeo neea aamo Timoteo, tiopachi pa'pamiratuame ajawaniame aamo nayewemane. Yooma tiopachi pa'pamiratuame kaawe yoorameopua ahpo tekipanao, epeche kaawe e'reka teteipuumepua pu'kao, Riosi tuuyewa masitiame enesoo osopena, tuumika ki'yaka itapiti kianiame ku'iwao. ¹⁸Wa'a tiame aamo chaaniamenia, Riosia Ehkoriaami Iyoterichio, eee cheeka iyoteteriamekopua: “Ka'te yakajipuremitiamua oisio, aamo tiirikoatekejokiteka oitioioipua.” Sewinachi Iyoterichioipua tiameo, eee chiiamepua: “Tekipanamea nateténiamepua.”

¹⁹Aaata tiopachi paamiratuame aamo weerariao, aaata ki kaawe ihsiameko tuusoopua pu'kao, nape ki u'pakame enesoo aaata tetewikame ookao paikaoiopua, ka'te pichikemitiamua pu'kao, apoe piineri chiiao, kihta nateyamekopua. ²⁰Aaata tiopachi paamiratuame ki kaawe iintokame tewitiameopua, ooka paikaoi tetewikame enesoopua pichiwatame, yooma tetewachi weeraka tísia teripupua pu'kao, wa'a yoratioopua pu'kao, yooma tetewikameo seewepakaopua, ki wa'achi nokinaremichiopua. ²¹I'ka no'o aamo pa'pamiratuame ajawanureriao, neea Riosi tetewachio, Riosie Weratiame tetewachio, Riosi tewekachi ku'iwari tetewachio, tísia kaawe aamo neesetojeraninia pu'kao, napati aamo tetewikapua aaataoi, ki aaata epeche teereweka. ²²Ka'te aaata ajawamitiapua, ki ne'nesaopua pahchao, ihtana tiameopua pu'kao, ki aaata aamo ki kaawe iintorio tuumichiopua, ki kaaweruma machenasoopua aamo weerariao.

²³Ihji no'o chiiaa, aaata ti'tijoeri chaachapamechitia tiamepua: “Ka'te neroiche nerojimitiamua, aamo eepi topachi kokoresaa, wiino ijipupua ku'ita.” Pukaepa muua, ke'chu aaata weeraiomua wa'a tiopachio, kaawe ne'nesa ihtana kaawe ihsiameko tijoe, werapupua.

²⁴Aaata ki ka'karuma nokiwaa, ma'chiame tetewiniamepua ke'chu ahjachi i'yaioopua itapiti ki kaawe iintoriao, nape iintuamepua tiameo, itapiti ki kaawe iintotiameo ki ikanati ma'chiame tetewiniameo, ahkasi te'ta i'yawesaape ahjachio. Pukaepa te'ta kaawe tiia ahjachi i'yewesa werapupua, aaata tiopachi paamiratumerio, seenekachi neipa ki kaawe ihsiamera enemaopua weratiameo. ²⁵Seenekachioopua aaata kaawe ihsiwaa, ki ikanati tetewiniamepua, puuyeniamie nakiyamepua aaata ku'we nane'repua kaawe ihsiamekoo, pu'kao kaaweruma tiiao.

6 Ehpeo aaata ahpo teekorachi te'tereniamie nayewamane. Aaata teekoemea Riosichi paparame enesaa, yooreka tetewame enepupua ahpo teekoo, kihta ki iyoriwa masitio tuupuaichioopua Riosio ahpo paparawiao, aaataeo wahjachi ti'tijoerieopua, ki na'arepuawichioopua tiaméo, taamoo aamo teekoeka mochikameo, Riosichi paparianiamie aamo masitiao.

²Aaata Riosichi paparame teekoemea, wa'apitia teekochitia yooreka tetewimetepua pu'kao, Riosichi paparamekoipua pu'kao ahpochitia. Riosichi paparamekopua ahpo teekoo, epeche te'ta yooreka tetewimeripua pu'kao, pu'kao Riosichio, ahpo pa'chichitia tiamekoopua pu'kao. Pu'kawichioo epeche kaawe yorakeka yorametepua pu'ka tekipanakiao, na'pa Riosichi te'teriamekapaopua. Yooma i'ka no'o aamo masitenuriao, utewaeme wa'a tiame masitepuapua, yooma wa'ami ahkai aamo asiyachio.

Te'ta pichiwari paarasari

³Aaata seenu te'terewa masitiamea, i'ka Eesusi Riosie Weratiamechi simiyame ka'karumara tuuyewario, pu'ka tuuyewarichi taamo paparaka mochitoao, ⁴ahpokamera tísia weruma uukao, ahpokamera tísia machiyame maaekoamepua. Puuuu ahpo Riosichi simiyame seesenu te'terepuame masitiamechio, tísia ahpo weruma erakoniamie tiamechipua wa'ao, tísia ahpo machiyamera erakoniamiechi, tísia nekakoniamie mehtáchaniachi, tísia nasiwaniame mehtachaniachi, tísia aaata na'arewachi, tísia nekamucheniachi aaata, tísia aaata ikotukewachi. ⁵Senepi taawechi wa'apitia nekakoka ma'chirepaniachipua wa'ao, ki ijinatarichi wewekaniachikapapua wa'ao, kiisi machiniamekapa wa'ao, Riosichi eename pichiwario. Puuuu, kihta machiyamepua, te'ta Riosi pichiwariraopua, te'ta Riosi iintoriaopua ahpo Taanaeo. Puuuu oowera seenu Riosichi simiyame masiteka, tomiwaremio erakoamepua. Nape muuu Timoteoa, ka'te pu'ka te'teria ahjama, teeremitiamua. ⁶Teemea Riosichi te'ta paparamea, paarasatiamepua paarasatia, nape taamo Riosichi paarasatiaa ki toomipua. Ihji paarasaria, te'ta Riosie te'ta taamo ta'iria mochitowa puuuu, Apoe te'ta taamo Riosi kiasiaeo, ihtaoi taamo nakiwiao. ⁷I'wa weechi naawaio, kihta iinueka naawakame teemea; wa'achitia mukisaoi, kihta i'tomeripua. ⁸Wa'a teeremeri enesoo mukiniamechio, kihta te'ta weemumete teemea i'ka wehjoarichi iintuameo, kooameche wisasoriche iinuekaio, kaawe erakomete teemea. ⁹Yooma u'matoka ohso e'rameopua paarasarichio, pu'ka ki kaaweruma tísia weemuwa paarasari ihsumarachi, wichiamepua. Puuu ki ka'karuma weemuniamea, taamo ki ka'karuma nokiwa ihsitiamepua, kiisi ijinata nokiwame, na'ara nokiwame aaata tiame. Yooma ihji ki ka'karuma nokiwamea, kominarichi simiwamepua, ahkasi yooma si'riwachi ki ka'karumachi wichiwachi, ahpoo pihtuka kajuyachisi. ¹⁰Siintoka weemuniame toomichio, yooma ihta ki ka'karuma naawarapua. Muuwaeme siintoka u'matoka toomichi weemupakamea, poanatumamepua Riosichio, Riosichi ahpo paparao; wa'a iikapa puuuu, tísia yuuwesi mochitoamepua, epeche tísia tomiwaereka mochinarewae aiwaka.

Aachin teeka ahpo inateniamie Riosichi paparaniamewichio

¹¹Nape muuu Timoteo Riosiwichio tekipanamekapao, yooma wa'a tiame weemuwachio, ikicha enepapuapua, kaawe aamo neesetoka, ki wa'a tiamechi aamo wichipuawichio. Ohso kaawe muuuu, kaawerumache ihsiamie enepapuapua, pewatiame yasitoame Riosichio, aamo Riosichi paparawa yasitao, aamo tesiwa tiame uuyame iikachio, kihta nahsinepaka tetewame aamo Riosichi

poponíwao, pipiniwa tiaméo. ¹²Utewaeme teetopuapua aamo Riosichi paparaniamé nehpuwarichio; pewatiame chapika yasitomitiamua, aamo ki wahjiamé ahjari Riosie aamo kiaretiao, Riosie aamo uumichio paajutetiao. Muuua pu'ka ki wahjiamé ahjari aamo Riosie kiaretiao, ki ookapi tuuyekame muuua, Eesusi Riosi Taanarachi paparakapa kiatiaméko tuuka. ¹³I'ka no'o aamo tísia neesetotiao, kiisi toaka aamo teetojeraninia pu'kao, kaawe teetokache kihta se'wikao, Riosi yooma ihta ahjari ki'yamera tetewachio, Eesusi Riosie Weratiame tetewachiopua tiameo, puuua Poonsio Piiratochio, ahpo ma'chitakame aatanakoo, Piiratoe ahpo iinatukenioio. ¹⁴Neeea i'ka no'o aamo neesetotiao, tísia aamo neesetojeraninia, ahkasi Eesusi Riosie Weratiame taamo Paamira eenachisi, kihta aamo ki kaawe chaachapapuaichiopua, aaataeo. ¹⁵Ihji Eesusi enameria, Riosi te'ta yomari aampa tiiamera e'rariapua, ihta taawechi yachatiaméchio, tekitepuame; ihji Eesusi Riosie tekimichio eratiamea, te'ta weeweruma ya'yawichio, te'ta yomatiamé aampa werumara tiiamepua, te'ta pa'pamiratuameopua, te'ta aampa Paamiratuamepua tiameo. ¹⁶Puuu Eesusi Noonoraa, apoe eenechi tekitemeria Eesusio ka'chitia taawechi mukuyamepua; puuua te'ta ki teesa taajenachi kahtiamerapua; aaataai pu'kao, kiisi ahseme tiiachi kahtiachio; pu'kao aaataeoi ki teteiwamepua ahpo pusieo, ka'chi iika tetewime tiiameopua pu'kao.

¡Pu'kakamera te'ta weruma iyoriwa kiapuamepua taamoeo, te'ta weruma utewari iinuewa e'rewa tiame! Wa'a tiiame e'rejeremitiapua naajúu.

¹⁷Pu'ka ti'tijoe ooweru tiame tísia paarasateka mochitoameo, chaanepuapua pu'kao, pu'ka ahpo iinueka mochikao, Riosi wa'a tiiame teewewiopa, wa'a te'terio tuuyepuapua pu'kao, pukao wa'a tiiame ta'iria mochitomichiopua, nape kihta weruma ahpo erakoka, tísia paarasatiapao. Pu'kao chaanepuapua tiameo, pu'ka weechi iintuame ahpo paarasatiao, kihtawichio kaaweko tuuyepuapua, Riosichi kaawe te'terepuao, pu'ka paarasario kihta tehpe e'ramekopapua. Wa'a tiiachipao, ohso kaawe Riosichikamera paparaka mochitonurepuapua pu'kao, apoe te'ta Riosi ahjamerakamerachi, pukachikamera te'ta oowe erakoka, taamoo chuurame wi'suame taamo nakiwia ki'yamechi. ¹⁸Pu'ka paarasatiameo chaanepuapua tiameo, pu'ka paarasario, ahpo iinuekaeopua paarasatiao, ihkokewa erakoka mochitojerepuapua pu'kao, tísia tesiwa te'tereka tooremuachiopua. Wa'a nokaka mochitsoopua ihkokekao, te'ta pichiware paarasari iinuemio tuuyepuapua pu'kao, Riosi ahjama mochiwachiopua, Riosi ye'karichi. ¹⁹Puuu wa'a te'tereka mochitosaapua ahpo paarasari tooremuame ihkokeka mochitokamea, te'pa tewekachikamera

paarasari muuwepatiame enemapua waikao, te'ta Riosi ahjama ahpo mochimiachiopua tewekachio, ahkasi ki wahjiamesio.

Paoro kajuyachi Timoteo neesetotewa

²⁰Muuu Timoteoa no'o aamo uhjurario, yoorakache itipipuapua wa'a ti'tiopachiamio. Ka'te e'waka keepumitia ki ijinatame nayewao. Puuu ti'tijoea tamochio, ki ookapi itapiti, tísia Riosichi simiyame peenewari machiwari teewaka masitiamepua, nape oowera wa'a chaachapaka nayewamepua, kihta machiyai Riosichi simiyameo. ²¹Ookapi Riosichi paparame ti'tijoea ooweru tiamea, pu'ka ti'tijoe wihkuari masitiakamera na'naritoamepua wa'asi, ikicha simiyamera ki Riosichi paparanimera, ipaka tetewamepua Eesusichi ahpo paparao, Riosie Weratiameo. Yooma aamo kahtiachi mochikamewichioo, Riosichi itayamenia pu'kao, ahpo te'ta kaawerumari kiasimichioo.

I'wasi ihjia, kaawe erakoka ehpeo. Wa'a ikisaa tísia kaawe enemapua.